



Bentiaraq Ottosen
Atassut

UKA 2024/126
17. oktober 2024

Pisortat namminersortullu suliffeqarfiini sulilerlaat tamarmik sullivimmi isumannaallisaanermik ilinniagaqarsimanissaasa inatsisitigut piumasaqaataalernerata aningaasatigut allaffissornikkullu kingunerisassaasa ersersinneqarnissaat siunertaralugu nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.

(Inatsisartunut ilaasortaq Anna Wangenheim, Demokraatit)

Atassummiit pingaartutut isigiugarput suliffeqarfik namminersortoq ineriartortunik aamma sulisoqarnissaa. Pingaartumimmi oqaatigisinnaavarput taamatut iliortoqartillugu sinaakkutit aamma pitsaanerulerlutik inissisimalernissaat. Eqqarsaatigiinnartigummi sullivinni avatangiiserisat pillugit ilinniarneq inuttut pissarsiffiunerpaasortoq, soorlu assersuutigineqarsinnaavoq sillimaniarnikkut periarfissat annertusarneratigut. Suliffeqarfiit imaluuniit suliffeqarfiit namminersortut periarfissaat pitsaanerulersissagitsigit, aqqut tamanna toqqarsinnaasariaqarparput.

Tamanna aamma inuussutissarsiutinik ilinniartitaanikkut periarfissaasoq ilisimalluarlutigu, ilinniarneq aallartikkaangat avatangiisinut nalilersueriaatsinik sillimaniarnikkut isumannaallisaaneq aamma ilinniarneqartarpoq. Eqqartorneqarsinnaasulli arlariit taajorneqarsinnaalluarput, soorlu oqaatigineqarsinnaasut tassaapput tarnikkut ikiueqqaarneq, ikiueqqaarneq, suliffiup avatangiisaa sillimaniarnikkut isumannaallisaanikkut nalilersuineq. Tamakkua eqqartorneqarsinnaasut isumaqarpunga suliffeqarfimmut namminersortumut imaluuniit namminersorlutik oqartussat suliffeqarfiutaanut suliffeqarfiillu allat peqatigalugit ineriartortinneqarsinnaasut. Sinaakkutit pitsaanerusariaqarput, Kalaallit Nunaat ineriartorpoq aamma sanaartornikkut, ukiunilu tullerni assaat sulisinnaasut amigaatigineqalertussaapput. Taakkua ineriartornikkut malinnaatissagutsigit sinaakkusersortariaqarpagut aqqutissiutissallugillu, taamaaliorutta aatsaat suliffeqarfiit eqeersimaartut avatangiisiminnut mingutitsinngitsumik ingerlataqalersinnaagaluarput.

Atassummiit oqaatiguarparput ineriartorneq taamatut isikkulik toqqarneqassaaq aqqutissiorneqarlunilu, tassami sulisartuunerup silarsuaani aamma tamanna qaammarsaanermik kinguneqarluarsinnaammat.

Taamatut oqaaseqarluta siunnersuut taperserparput, inuussutissarsiornermut aatsitassanullu ataatsimiititaliamut ingerlateqqillugu.